

Takornariartitsisarnermik inuussutissarsiuteqarnerup amma nunami inuussutissarsiutit siuarsarneqarnissaat pillugit Inatsisartut inatsisaat

Kapitali 1.

Siunertaa

§ 1. Inatsisikkut siunertarineqarpoq inuussutissarsiutinik siuarsaalluni aaqqissuussinermik atuinikkut nunatsinni najugallit inuussutissarsiornerisa ineriertortinnejcarnerat nukittorsassallugu, taamatuttaaq nunap immikkoortuini inuussutissarsiutinik ineriertortitsineq siuarsassallugu. Taamaaliornissaq siunertalarugu inuussutissarsiutinik pilersitsiortornermut, takornarianut innuisarfnnik pilersitsiortornermut, annertusaanermut nutarterinerimullu, tunisassianik ineriertortitsinermut, kiisalu kinguariit paarlattarnerisa isumannaallisarneqarnerannut aningaasaliissutinik pissarsiniartarnermut killissarititaasunik piumasaqaataasut pitsanngorsarneqarnissaat annertusarneqarnissaallu.

Atuuffia

§ 2. Inatsimmi pineqarput takornariartitsinermik inuussutissarsiummi nunamilu inuussutissarsiutini ingerlatat.

Imm. 2. Inatsit una naapertorlugu tapersiissuteqartoqarsinnaangilaq siunertanut Inatsisartut aalisarnermut, piniarnermut aamma nunalerinermut tapersiisarneq pillugu peqqussutaanni pineqartunut.

Ingerlatat

§ 3. Inatsisip siunertaa eqqortinniarlugu aningaasanut ukiumoortunik inatsisini aningaasaliissutit iluanni ingerlatsisoqarsinnaavoq ilaatigut makkununnga tunngasunik:

- 1) suliffeqarfimmik aallartitsinermut atatillugu aningaasanik pissarsinissaq,
- 2) kinguariit nikinneranni aningaasatigut ajornartorneernut atatillugu immikkut ittumik aningaa sanik pisariaqartitsinerup aaqqiivigineqarnissaani peqataaneq,
- 3) takornarianut unnuisarfnnut atatillugu sanaassanut aningaasanik pissarsisarnissaq aamma
- 4) tunisassianik ineriertortitsinermut aningaasanik pissarsisarnissaq.

Taaguutinut nassuaatit

§ 4. Unnuisarfiit inatsimmi pineqartut paasineqassapput tassaasut illuliat takornarianit nunatsinniikkallartunit akiliilluni atorneqarsinnaasut. Unnuisarfinnut ilaatinneqarput ini unnuiffissatut naatsorsuussaq kiisalu atortorissaarutit unnuinissamut toqqaannartumik tunngassuteqartut, imaluunniit sanaamut pineqartumut atassuteqartumik pisariaqartinneqartut.

Kapitali 2.

Qularnaveeqqusiineq

§ 5. Naalakkersuisut inatsimmut killiliussat iluanni qularnaveeqqusiisinhaapput ingerlatanut makkununnga taarsigassarsinissamut atatillugu:

- 1) Suliffeqarfimmik pilersitsinissaq,
- 2) Kinguaariit nikinneranni aningaasatigut ajornartoortut ingerlaqqissinnaanissaannut, tak. § 6,
- 3) Tunisassianik ineriartortitsinermut,
- 4) Unnusarfnnik pilersitsinernut, allilerinernut aamma iluarsaassinernut, tak. § 7.

§ 6. Kinguaariit nikinneranni aningaasatigut ajornartoornermut atatillugu qularnaveeqqusiinissamut piumasaqaataavoq,

- 1) pissutsinik avataaneersunik pissuteqartumik aningaasaliiffigineqarnissamik tassanngaannartu mik pisariaqartitsilerneq,
- 2) suliffeqarfik aningaasaliiffigineqarnissamik tassanngaannartumik pisariaqartitsilernerup nalaanili kinguaariit nikinnissaannik sulissutiginnilereersimassasoq,
- 3) kinguaariit nikinnissaat aaqqissuussamik pilersaarusiorneqareersimassasoq aamma
- 4) suliamik paasisimannittut naliliinerisigut pineqartoq tassaassasoq kinguaariit nikinnerat, aningaasanut tunngasut pillugit imminut akilersinnaasutut naliliiffigineqartoq.

§ 7. Unnusarfnnut atatillugu sanaartugassatut suliniutinut makkununnga taarsigassarsinissanut Naalakkersuisut qularnaveeqqusiisinhaapput:

- 1) Illunik maannamut siunertanut allanut atorneqarsimasunik unnusarfnnik pilersitsinissanut,
- 2) Illut pioreersut unnusarfittut atorneqartut allilernissaannut,
- 3) Illuni nutaani unnusarfnnik pilersitsinissanut,
- 4) Unnusarfit pioreersut iluarsaannissaannut.

Imm. 2. Uppernarsarneqassaaq sanaartugassatut suliniut teknikkut isumannaatsuusoq aamma siunissaq ungasinnerusoq isigalugu imminut akilersinnaassasoq, takornariartitsisarnermik inuussutissarsiuteqartup ineriartinneranut naapertuuttuusoq aammalu nunap immikkoortuini, naatsorsuutigineqartumik pisissananik tunngavissaqartuni, takornariartitsinersarnermik inuussutissarsiuteqarnerup ineriartorneranut siuarsaataasoq.

§ 8. Aningaaserivimmit, sparekassimit realkreditinstituttimit, Nunat Avannarliit Killiit Aningaasaateqarfiannit taakkuluunniit akuleriissillugit taarsigassarsianut qularnaallisaatitut qularnaveeqqusiisoqarsinnaavoq. Qularnaveeqqusiissut taarsigassarsiarineqartut akilersorneqarnissaattut sivisussusilerneqassaaq.

Imm. 2. Taarsigassarsiarineqartut annerpaamik 50%-iinik qularnaveeqqusiisoqarsinnaavoq.

Taarsigassarsitsisoqassaaq niueqatigiinnikkut taarsigassarsitsisarnermi atugassarititaasut malillugit, taamaattoq akilersuisoqassalluni sivisunerpaaamik ukiuni qulini.

Imm. 3. Taarsigassarsianut qularnaveeqqusiisoqarsinnaavoq inunnut suliffeqarfinnullu, taarsigassarsitsinerup nalaani Nunatsinni inuussutissarsiummik pineqartumik ingerlataqarnissamut pisinnaatitaasunut.

Imm. 4. Qularnaveeqqusiinissamut piumasaqaataavoq suliniut aningaasanut tunngassutilinnut paasisimasalinnit imminut akilersinnaasutut naliliiffigineqarsimassasoq.

Imm. 5. Qularnaveeqqusiinermi Nunatta karsiata akiliisussatut pisussaaffigissavai taarsigassarsi-

arineqaqqaartunit qanoq ilinikkulluunniit akiitsut sinnerisa ilai, aningaasanik taarsigassarsiarine-qaqqaartunit qularnaveeqqusiissutaasunut naleqqiullugit taamaaqataat.

§ 9. Qularnaveeqqusiisqarnikkut taarsigassarsiarineqartut akilersornissaannik pisussaaffimmik sumiginnaanermi taarsigassarssianik aningaasalersuisup noqqaassuteqarneratigut qularnaveeqqusiineq piviusunngortinnejqassaq.

Imm. 2. Akilersuinissamik pisussaaffimmik sumiginnaanermi akiitsullip akiitsuisa sinnerinut qularnaveeqqusiissutit taamaaqataat Naalakkersuisut akiitsulimmut piumasaqaatigissavaat.

Kapitali 3.

Takornariartitsinermik inuussutissarsiuteqarnermi unnuisarfinnut immikkut tunngassutilit

§ 10. Naalakkersuisut aningaasaateqarfimmik pilersitereerput siunertaqartumik takornarianut unnuisarfinnik pilersitsinermut atatillugu ernialinnik taarsigassarsisitsinissarfimmik imaluunniit akuleriissillugit erniaqarnatillu taarsersuutitaqanngitsunik aamma ernialinnik taarsersuutitalinnillu taarsigassarsitsisartussamik, tak. § 3, nr. 3. Aningaasaateqarfiup aqqa aningaasaateqarfimmullu ileqqoreqqusat Naalakkersuisunit aalajangerneqassapput, taamaattoq tak. imm. 4 aamma § 11. Aningaasaateqarfiup siunertaa Naalakkersuisut akuersinerisigut allanngortinnejqarsinnaavoq aningaasaateqarfimmit qularnaveeqqusiinermut atatillugu suliassat suliarineqarnissaanut atortussanik suliaqarsinnaanissaq kiisalu inuussutissarsiutip iluani periarfissanik misissuinernik suliniutinillu nutaanik aallartitsisarnissaq siunertaralugu. Aningaasaateqarfiup ileqqoreqqusat allanngortinnejqarneri Naalakkersuisunit akuersissutigineqartassapput.

Imm. 2. Aningaasaateqarfik pilersinneqarpoq aningaasaateqarluni 15 mio. kr.-inik, taakku tunniunneqarlutik aningaasanngorlugit ataatsikkut akiliinikkut. Aningaasaateqarfimmut aammaarluni aningaasaleeqqittoqarsinnaavoq.

Imm. 3. Aningaasaateqarfik Naalakkersuisunit nakkutigisaavoq, taakkualu nakkutigissavaat aningaasaateqarfiup sulinera lnatsisartut inatsisaanni aalajangersakkat naapertorlugit ingerlanneqartoq. Paasissutissat uppernarsaatissallu nakkutilliinerminnut pisariaqartinneqartut tunniunneqarnissaat aningaasaateqarfimmut Naalakkersuisut piumasarisinnaavaat.

Imm. 4. Aningaasaateqarfiup ukiumoortumik naatsorsuutaata malippaat qaammatisiutit ukiuat. Ukiumoortumik naatsorsuutit kukkunersiorneqartassapput kukkunersiuusumit naalagaaffimmitt akuerisaasumit Naalakkersuisunillu toqqagaasumit.

Imm. 5. Aningaasaateqarfiup siunertat imm. 1-imi taaneqartut saniatigut aningaasaatini atorsinnaavai aningaasaateqarfiup sulinerani pisarialimmik aningaasartuutinut matussutissanut.

Imm. 6. Aningaasaateqarfik taamaallaat taarsigassarsisitsisinnaavoq qinnuteqartup aamma sanaartugassap piumasaqaatit § 7-imi, takuuk § 4, aamma § 8, imm. 3-4-imi aalajangersarneqarsimasut kiisalu maleruaqqusani inatsit tunngavigalugu pilersinneqartuni piumasaqaataasinhaasut eqqortippatigik. Taarsigassarsiat tamatuma kingorna kapitalimi matumani piumasaasut malillugit isumagineqassapput.

Imm. 7. Aningaasaateqarfiup siulersuisui allatseqarfimmik pilersitsissapput, suliffeqarfimmullu naapertuuttumut tamanna pillugu isumaqatigiissuteqarsinnaallutik.

Imm. 8. Aningaasalersuisarfimmi atorfilik aningaasaateqarfiup allatseqarfiani suliassanik inatsit naapertorlugu isumaginnittooq peqataassangilaq aningaasalersuisarfiup inatsit una naapertorlugu qinnuteqaatinik sunilluunniit suliarinninnerani.

Imm. 9. Aningaasaateqarfik atorunnaarsinneqassappat tamanna pissaaq lnatsisartut inatsisaatigut.

Aningaasaateqarfiup aningaasaatai aningaasaateqarfiup atorunnaarsinnejnerani Nunatta karsiata pigilissavai, taamatullu Namminersornerullutik Oqartussat aningaasaateqarfiup pisinnaatitaaffi pisussaaaffilu tigussallugit.

§ 11. Aningaasaateqarfik aqunneqassaaq siulersuisunit tallimanik ilaasortaqaqtumit taakkununngalu sinniisussanit. Siulittaasoq siulersuisunullu ilaasortat allat toqqarneqassapput Naalakkersuisunit ukiut marlukkuutaarlugit, aningaasaateqarfiup pilersinnejneraniit aallartittumik. Siulersuisunut ilaasortaq ataaseq taassumalu sinniisussaa Greenland Tourism A/S, Takornariaqarneq pillugu Siunnersuisoqatigiinnit toqqarneqassaaq kiisalu siulersuisunut ilaasortaq ataaseq taassumalu sinniisussaa nunatsinni aningaaseriviit peqatigiillutik toqqassallugu. Sulisitsut Peqatigiiffia aamma Nunatsinni Niuernermi, Sullissinermi, Assartuinermi Suliffissaqarnermilu Kattuffiup siulersuisunut ilaasortaq ataaseq taassumalu sinniisussaa peqatigiillutik toqqassavaat. Aningaasaateqarfimmi siulersuisunut ilaasortaaneq qinikkatut pisortanilluunniit toqqakkatut suliassaqartitaanerunngilaq.

§ 12. Aningaasaateqarfimmi taarsigassarsisitsisoqarsinnaavoq taarsigassarsiat erniaqarnatillu taarsersuutitaqanngitsut aamma taarsigassarsiat erniallit akuleriissillugit. Aningaasaateqarfiup siulersuisuisa, taarsigassarsiaritat annertussusissaat taarsigassarsisumullu atugassarititaasut assigiinngitsut aalajangerlугit, tassungalu ilanngullugit taarsersuutinik ernianillu akiliisitsiniartarneq akiliisitsisarnerlu aalajangissavaat, taamaattoq takuuq § 13.

Imm. 2. Aningaasaateqarfimmit taamaallaat taarsigassarsisitsisoqarsinnaavoq suliniutinut § 7, imm. 1-imi taaneqartunut, taamatullu § 7, imm. 2-mi piumasaqaatit eqqortinneqassallutik.

§ 13. Aningaasaateqarfimmit inatsit una naapertorlugu taarsigassarsisitsilluni aningaasaliisoqarsinnaavoq ingerlatanut § 7, imm. 1-imi taaneqartunut aningaasaliinerit tamarmiusut annerpaamik 40%-iinik.

Procentip annertussusissaanut aalajangiisuussapput suliniutip tamarmiusup qanoq imminut akilersinnaatigissusia aamma suliniutip allatut iliorluni aningaasaliiffigineqarsinnaaneranut periarfissat. Taarsigassarsisitsilluni aningaasaliinissap taaneqartup minnerpaamik 50%-ii tunniunneqassapput taarsigassarsiatut erniallikkatut. Qularnaveeqquisiineq aamma sallititsinissamik piumasaqaat taarsigassarsiat, erniaqaratillu taarsersuutitaqanngitsut, taarsigassarsiat erniallit aamma taarsigassarsiat aningaasaateqarfimmiit qularnaveeqquisiineq tunuliaqutaralugu pilersinnejartut akuleriissinnerini tamani imm. 2-4-mi piumasaqaatit eqqortinneqassapput.

Imm. 2. Taarsigassarsiat taarsersornissaannut piffissaliussap taarsigassarsiat allat taarsersornissaannut piffissaliussat assigissavai, taamaattoq sivisunerpaamik ukiut 20-ussalluni. Assigiinngitsunik aralinnik taarsigassarsisoqarpat taarsersornissaannut piffissaliussap sivisunerpaaffissaa atutissaaq inatsit una naapertorlugu taarsigassarsiaritanut, taamaattoq piffissaq taarsersuiffissaq sivisunerpaamik ukiut 20-ussalluni. Taarsigassarsiat erniallit naafferartumik taarsersorneqassapput taarsigassarsiat atsiorneqarnerminni angissusiat tunngavigalugu ukiut tamaasa taamaaqatigiaamik appartinnejartassapput. Allanik taarsigassarsisoqarsimanngippat, taava taarsigassarsiat taarsersorneqassapput ukiuni qulini aamma taarsigassarsiat erniaqaratillu taarsersugassaangngitsut appartinnejartassapput taarsigassarsiat atsiorneqarnerminni angissusiisa 10%-iannik taarsigassarsiat ulloq tunniunneqarfianniit naatsorsukkamik qaammatisit 12-it qaangiunneri tamaasa.

Imm. 3. Taarsigassarsiat erniallit erniaasa malissavaat naalagaaffiup aningaaseriviata erniaritaa sukkulluunniit atuuttoq, tassunga ilanngullugit ilassutaajunnartut aningaasaateqarfiup siulersuisuisa

aalajangigaat, taamaattoq annerpaamik 2%-pointimik.

Imm. 4. Aningaasaateqarfiup taarsigassarsiarititai qulakkeerneqassapput unnuisarfiup taarsigassarsitsissutigineqartup qularnaveeqqusiunneratigut. Qularnaveeqqut sapinngisamik pitsaanerpaamik salliuutinneqassaaq, taamaattoq allamiit aningaasalersuineq ataqqineqassalluni aningaasaliissutit tamarmiusut imm. 1-imti taaneqartut qummut 40%-ii tikillugit. Qularnaveeqqusiussaq taarsigassarsitsisumit sallinnguukkiartuaartussatut qularnaveeqqusiiffigineqassanngilaq.

§ 14. Unnuisarfik piffissap taarsigassarsiat taarsorsorneranni siunertamut taarsigassarsisitsinermi naatsorsuutigineqartumut atorneqanngippat imaluunniit taarsigassarsisitsinermi piumasaqaatit sumiginnarneqarpata taarsigassarsiat appatinneqanngitsut ingerlaannartumik akilerneqartussanngussapput.

Imm. 2. Unnuisarfik aningaasaliiffigineqarnikoq nutaamik piginnittortaarpas taarsigassarsiat appatinneqanngitsut ingerlaannartumik aamma akilerneqartussanngussapput. Piginnittortaap aamma unnuisarfiup Inatsisartut inatsisaanni matumani piumasaqaatit, nutaamik piginnittortaareernermermi eqortippatigik, taava aningaasaateqarfiup akuersaarsinnaavaa piginnittortaap piginnittuunikup aningaasaateqarfimmuit pisussaaffiinik tigusinissa.

§ 15. Taarsigassarsisut, tassaagunik inuit imaluunniit suliffeqarfiit, Kalaallit Nunaanni tamakkiisumik akileraaruserneqartussaatitaassapput piffissami taarsigassarsiat tunniunneqarfianni.

Kapitali 4.

Tunisassianik ineriartortitsinermut tapiissutit

§ 16. Naalakkersuisut tunisassianik aamma sullissinernik ineriartortitsinermut tapiissuteqarsinnaapput.

Imm. 2. Tamatumani piumasaqaataavoq tunisassianik suliarinninnerup imaluunniit sullissinerup ingerlanneqarnerata Kalaallit Nunaanni ingerlanneqarnissaa.

Imm. 3. Tapiiffigineqartut tassaagunik inuit imaluunniit ingerlatseqatigiffit taakku Kalaallit Nunaanni tamakkiisumik akileraartussaatitaassapput piffissami tapiissutit tunniunneqarfianni.

§ 17. Tapiissuteqartoqarsinnaavoq ukioq ataasiakkaarlugu. Tapiiffigineqareersimagaanni tamanna akornutaassanngilaq nutaamik tapiiffigineqarnissamik qinnuteqarsinnaanermut.

Imm. 2. Tapiissuteqartoqartassaaq qinnuteqartoqarneratigut, suliniutit tamaasa immikkut naliliiffiginerisigut.

Imm. 3. Tapiissuteqartarneq unitsinnejqarsinnaavoq

- 1) suliniut piviusunngortinnejqarsinnaajunnaartutut naliliiffigineqarpas,
- 2) tapiiffigineqartoq eqqunngitsunik paasinerluutaasinnaasunilluunniit paassisutissiisimappat, imaluunniit
- 3) tapiiffigineqartoq paassisutissanik tapiiffigineqarnissamut pingaarutilinnik nipangiussisi mappat.

Kapitali 5.

Allaffissornikkut ingerlatsineq nakkutilliinerlu

§ 18. Tapiissuteqarnissaq, qularnaveeqqusiinissaq aamma taarsigassarsisitsinissaq pillugit erseqqinnerusumik piumasaqaatissat Naalakkersuisut aalajangersaavigisinnaavaat.

Imm. 2. Naalakkersuisut pisortanut oqartussaasunut allanut imaluunniit allaffissornikkut ingerlatsinermik ingerlatseqatigiffinnut isumaqtigissuteqarsinnaapput suliap inatsit naapertorlugu suliassanik piareersaanermi isumaginnituunissaanik.

Imm. 3. Naalakkersuisut - imaluunniit Naalakkersuisunit piginnaatinneqartut - inunnut suliffeqarfinnullu,

inatsit una naapertorlugu aningaasanik pissarsisunit, piumasaqaatigisinnavaat paasissutissanik naatsorsuutinillu tamanik allaffisornermut il.il. pisariaqartinneqartutut isigineqartunik tunineqarnissaq.
Imm. 4. Naalakkersuisut inatsisip aqunneqarnera nakkutigissavaat.

Kapitali 6.

Suliassanik naammagittaalliuutinillu suliaqarnissamut maleruaqqusat

§ 19. Inatsisartut pisortat ingerlatsineranni suliassat suliarineqartarnerat pillugu inatsisaat aamma atuuppoq allaffissornikkut ingerlatsinermik ingerlatseqatigiiffimmut suliassanik piareersaanissaq pillugu Naalakkersuisut taamaattumut isumaqatigiissuteqarpata, tak. § 18, imm. 2.

§ 20. Aningaasaateqarfimmit kapitali 3-mi pineqartumit taarsigassarsisitsinermut atatillugu aalajangiinerit, ullormit aalajangiinerup qinnuteqartumut nalunaarutigineqarfianiit sapaatip akunneri sisamat qaangiutsinnagit naammagittaalliuutigineqarsinnaapput aningaasaateqarfiup siulersuisuinut, taassumalu aalajangiinera inaarutaasumik aalajangiineruvoq.

Imm. 2. Inatsit manna naapertorlugu aalajangiinerit allat, ullormit aalajangiinerup qinnuteqartumut nalunaarutigineqarfianiit sapaatip akunneri sisamat qaangiutsinnagit Naalakkersuisunut naammagittaalliuutigineqarsinnaapput.

Kapitali 7.

Pineqatissiinissamik aalajangersakkat

§ 21. Inatsit manna malillugu eqqunngitsunik paatsoortitsisinnaasunilluunniit paasissutissiisoq imaluunniit paasissutissanik nipangiussisoq akiliisussanngortinneqarsinnaavoq. Akiliisitsissutit Nunap Karsianut nakkartinneqassapput.

Imm. 2. Suliffeqarfik naalagaaffimmit, Namminersornerullutik Oqartussanit, kommunimit, kommuninit ataatsimoortuni, aktiaateqarluni ingerlatseqatigiiffimmit, piginneqataassuteqarluni ingerlatseqatigiiffimmit, piginneqatigiiffimmit, assigisaannilluunniit ingerlanneqartoq unioqqutitsisuuppat suliffeqarfik taannaalluni akiliinissamut akisussaatinneqassaaq.

Kapitali 8.

Atuutilerfia aamma ikaarsaariarnermi aalajangersakkat

§ 22. Inatsit atuutilissaqq ulloq 1. januar 2002-imi. Tamatumunnga peqatigitillugu Takornariartitsisarnermk inuussutissarsiuteqarnermut aningaasalersuinikkut tapersiisarneq pillugu Inatsisartut inatsisaat nr. 15, 31. oktober 1996-imeersoq kiisalu Nunami inuussutissarsiutinut aningaasalersuinikkut tapersiisarneq pillugu Inatsisartut inatsisaat nr. 20, 30. oktober 1998-imeersoq atorunnaarsinneqarput.

Imm. 2. Imm. 1-imi aalajangersagaq apeqqutaatinnagu nalunaarutit maligassiallu allat Takornariartitsisarnermk inuussutissarsiuteqarnermut aningaasalersuinikkut tapersiisarneq pillugu Inatsisartut inatsisaat nr. 15, 31. oktober 1996-imeersoq imaluunniit Nunami inuussutissarsiutinut aningaasalersuinikkut tapersiisarneq pillugu Inatsisartut inatsisaat nr. 20, 30. oktober 1998-imeersoq tunngavigalugit pilersinneqarsimasut atuutiinnassapput atortuujunnaarsinneqarnissamik tungaanut.

Imm. 3. Taarsigassarsinissamik neriorsuutit, qularnaveeqqusinerit imaluunniit tapersiivigineqarnissamik neriorsuutit takornariartitsisarnermk inuussutissarsiuteqarnermut aningaasalersuinikkut tapersiisarneq pillugu Inatsisartut inatsisaat nr. 15, 31. oktober 1996-imeersoq imaluunnit nunami inuussutissarsiutinut

aninaasalersuinikkut tapersiisarneq pillugu Inatsisartut inatsisaat nr. 20, 30. oktober 1998-imeersoq tunngavigalugit pilersinneqarsimasut atuutiinnassapput.

Imm. 4. Siusinnerusukkut qularnaveeqqusiissuteqarnikkut taarsigassarsiaritinnejqarsimasut imaluunniit qularnaveeqqutit tapersiissutillu akuleriissillugit Takornariartitsinermik inuussutissarsiuteqarnermi aallarnisaasaasartunut aninaasalersuinikkut tapersiisarneq pillugu Inatsisartut inatsisaat nr. 15, 31. oktober 1996-imeersoq siusinnerusukkut atuuttoq naapertorlugu tunniunnejqarsimasut pillugit nuunnejqarnissaannik neqerooruteqarnissamut Naalakkersuisut piginnaatinnejqarput.

Namminersornerullutik Oqartussat, ulloq 12. november 2001.

Jonathan Motzfeldt

/

Solja í Olavstovu

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviit

Naalakkersuisut